

## KRAB

*Georges De Vassoignes*

Krab té ka viv asou latè  
La ki ni dlo, pa lwen lanmè.  
Silon la i té ka rété a  
I té ka pran koulè tè-a.  
Tout fos-li sété kouri  
Antré an trou'y, bouché djol-li  
Epi zékal-li pou séré.

Men an jou, lanmè monté :  
Krab savann alé pli lwen  
Yo pa té bizwen chanjé ayen.  
Dot monté séré an falez, sé Touloulou  
Yo pa ni dlo pou brè, yo meg kon klou.  
Sirik rété an fon lanmè  
Zagaya pran pa bò larivyè ;  
Yo toulédé plat kon lanmen,  
Tala jòn épi nwè kon woch épi solèy  
Lot-la gri konsi sé sab lanmè ki anlè'y.  
An konpanyi rété pri an labou,  
Yo violet, koulè dlo mang, sé Mantou.  
Lè ni lapli yo ka monté pyé bwa.

Men chak krab-la kapon menm  
mannyè-a  
I ka kouri dépi an bwi fet bo'y.  
Sé pou sa lè an moun ni an mannyè pè  
koy  
Lézot ka di sé krab, sirik enben koutja.

## KRAB SÉMAFOT

*Georges De Vassoignes*

Yo ka viv owa dlo  
Lasab-la asé red  
Pou yo pé fè tou yo.  
Lè lanm-lan ka vini  
Epi chapo tjim-li  
Pou niché pyé laté  
Yo tout ka disparet.  
Men dépi i ripati  
Yo ka viré paret  
Epi gwo modan-yo  
Ki ka sèvi fouchet  
Pou mété an bouch-yo  
Tou sa ki ka pasé.  
Sa ki pa sav pé kwè  
Sé an lapriyé  
Sé ti krab-la ka fè  
« Sémafot ! Padon Bondyé ! »  
...